

SUMÁRIO

Antes Ordem Do Dia — Sr. Presidente loke sessão plenária ba primeiro dia 4.^a Sessão Legislativa ba III Legislatura iha tuku 10 liu minuto 2 dadeer no halo leitura ba agenda trabalho loran ne'e nian.

Tuirmai iha mós execução ba hino nacional «*Pátria*».

Sr. Presidente hussu ba bancada sira atu apresenta sira-nia candidato sira hodi eleje ba membro Conselho Superior da Defensoria Pública, Conselho de Opinião da Rádio e Televisão de Timor-Leste, Conselho Superior do Ministério Público, Conselho de Imprensa e Comissão de Homenagem. Nia hato'o mós katak Presidente da República labele participa iha sessão ne'e tanba halo visita ba rai-li'ur, nune'e sugere atu participa iha última Sessão Legislativa iha tinan 2016.

Iha intervenção diversa sira: Sr. Manuel Gaspar (FRETILIN) hato'o nia observação ba atraso hodi hahú sessão ne'e. Nia lamenta ba transporte ró hussi Oecússi mai Díli, estrada iha suco Dahudo ne'ebé aat, no la iha acesso ba eletricidade.

Sr.^a Brígida Antónia Coreia (CNRT) questiona pessoal saneamento ne'ebé la seguro ba saúde nian bainhira hala'o serviço hodi recolhe lixo.

Sr. Leonel Lisboa Marçal (FRETILIN) questiona trator sira ne'ebé Direção Agricultura Municipal recolhe hotu ba oficina, nune'e la consegue fila rai iha suco Maudemo. Nia mós lamenta tanba iha Posto Administrativo Fatumean, comunidade sei usa ossan *Rupiah*, no iha Fohorem no Fatulúlic estrada sei aat.

Sr.^a Benvinda Catarina Rodrigues (FRENTI-MUDANÇA) sugere ba Governo atu hadi'a eletricidade iha Kampung Tuti, Comoro, no hato'o katak estrada iha parte Bebonuk rai-rahun mak barak.

Sr. Manuel de Castro Pereira (FRETILIN) hussu ba Ministério das Obras Publicas atu controla empresário sira ne'ebé hadi'a estrada, Ró Nakroma ne'ebé para kleur la halo manutenção, programa fila rai gratuita no construção estrada iha Assalaitula ne'ebé la la'o.

Sr. Virgílio da Costa Hornai (PD) hussu atu Governo organiza didi'ak cabo eletricidade ne'ebé dada sabraut iha cidade Díli laran, ba Ministro sira mak atu hatán de'it ba Deputado sira-nia preocupação. Nia mós preocupa no hussu atu muda política fiscal atu nune'e ema estrangeiro sira labele domina economia País nian no sugere atu desenvolvimento ne'e hala'o mós iha município sira.

Sr. Eládio António Faculto de Jesus (FRETILIN) hussu ba Presidente Parlamento atu tun bá visita fatin sira iha Bazartete, ne'ebé hanessan knua Presidente Nicolau Lobato nian tanba povo barak mak sei halerik ba eletricidade no bee moos. Nia critica Padre Martinho Gusmão ne'ebé difama fali partido CNRT no partido FRETILIN no lamenta tebes ba importação foos hussi Tailândia ne'ebé la iha qualidade. Ikusliu, hussu ba Governo atu la bele halo exploração ba povo nia produto local.

Sr. Francisco da Costa (CNRT) hussu ba Governo atu tau matan ba companhia China nian ne'ebé construi drenagem iha suco Larissula, Posto Administrativo Baguia. Nia hussu mós ba Governo atu halo estudo didi'ak mak foin taka estrada kuak hirak ne'ebé iha no apela ba povo sira hotu katak la bele ona halo uma bessik estrada boot. Tuirmai, nia lamenta tebes ho funcionário nível ki'ik sira iha Ministério da Saúde ne'ebé Governo ko'a fali sira-nia ossan subsídio, nune'e mos ba carreta ne'ebé para arbiru iha mercado Becora.

Sr. Francisco Miranda Branco (FRETILIN) declara katak iha 4.^a Sessão Legislativa ne'e Parlamento Nacional tem que fó prioridade ba lei sira ne'ebé importante ba Estado. Nia mós hussu atu iha discussão Orçamento Geral do Estado (OGE) 2016 halo balanço ba ossan Ministério Agricultura e Pescas nian no molok discussão OGE 2016 ne'e mós Parlamento Nacional tem que iha ona audiência ho cada Ministério.

Sr.^a Jacinta Abucáu Pereira (PD) hussu ba Ministério da Saúde atu hadi'a odamatan hariis-fatin iha Hospital Nacional Guido Valadares (HNGV). Deputada ne'e mós hussu ba Ministério do Turismo no Ministério da Administração Estatal atu tau matan ba meio ambiente iha Largo Lecidere. Ikusliu, nia hato'o ba Governo atu chama atenção ba pulsa Telkomcel nian balu ne'ebé nia qualidade la di'ak.

Sr. Felisberto Monteiro Guterres (FRETILIN) hussu ba equipa de controlo bee moos nian atu haree comunidade iha Delta III la hetan bee moos. Nia hatutan comunidade Vemasse nia lamentação ba hadi'a estrada ne'ebé baban de'it no ikusmai aat filafali. Deputado ne'e lamenta tebes tanba povo barak mak sei halerik ba bee moos no estrada. Tuirmai, nia hatutan mós katak comunidade Assalaitula, Venilale nian, lamenta tebes tanba iha orçamento ba alcatrão nian, maibé seidauk hadi'a nafatin estrada.

Sr. Paulino Monteiro (PD) hussu atu Ministério relevante sira halo política de gestão ne'ebé didi'ak, nune'e execução orçamento ne'e mós bele di'ak. Nia mós hussu ba Ministro do Turismo atu planeia didi'ak hodi cria infraestrutura básica, nune'e bele dada investidor mai Timor-Leste.

Sr.^a Ilda Maria da Conceição (FRETILIN) hussu ba Ministra no Vice-Ministra da Saúde atu tau matan ba enfermeiro no doutor sira ne'ebé halo atendimento la di'ak ba paciente sira iha HNGV. Deputada ne'e hussu ba Ministra das Finanças atu gere ossan ne'e loloos, nune'e funcionário ki'ik sira la bele sai fali vítima.

Sr. Antoninho Bianco (FRETILIN) hussu ba Governo atu hadi'a máquina raio-X ne'ebé avariado iha fronteira Salele no Batugadé tanba sussar atu revista sassán sira ne'ebé tama. Nia hussu mós atu Governo tau matan ba mercado iha Salele ne'ebé halo ona, maibé la usa, e hussu salvaguarda mina ilegal ne'ebé prende hela iha Comando Polícia municipal Batugadé. Tuirmai, Deputado ne'e hussu atu tau matan mós ba médico iha suco Edi, Ainaro, ne'ebé la metin iha fatin hodi atende paciente sira. Ikusliu, hato'o ba Governo atu tau matan ba centro produção café iha suco Aituto, Maubessi, ne'ebé ema barak sai afetado tanba halo contaminação ba bee moos.

Sr.^a Aurora Ximenes (FRETILIN) informa katak iha Liquiçã, veterano balu mak impede fali projeto eletricidade nian. Nia hato'o mós katak iha suco Fahilebo no Assumanu instalação ahi eletricidade nian la to'o iha-ne'ebá no hussu atu Governo prioriza eletricidade ba povo. Ikusliu, nia hato'o povo nia lamentação katak sira-nia produto local la'ós Governo mak sossa tuir promessa ne'ebé iha maibé companhia mak sossa fali.

Sr.^a Anastácia da Costa Amaral (FRETILIN) questiona estrada nia luan iha parte Comoro, problema eletricidade, bee moos iha Uatucarbau no irrigação Irabere ne'ebé seidauk implementa.

Sr. Paulo Moniz Maia (FRETILIN) questiona eletricidade no estrada iha Lolotoe, construção ponte ida iha Maliana ne'ebé seidak remata, sugere ba Ministério da Educação atu nomeia diretor escola tem tuir nia mérito. Ikusliu, nia hussu atu halo manutenção ba sede suco sira iha rai-laran.

Sr.^a Angélica da Costa (FRETILIN) secunda declaração Deputado sira-nian kona-ba problema eletricidade, estrada no bee mos ne'ebé acontece iha Timor laran. Nia lamenta estrada Ainaro ne'ebé nakonu ho fatuk, estrada parte Nu'u-Laran, Same, ne'ebé rai-rahun barak. Deputada ne'e hussu atu controla bandeira sira ne'ebé hassa'e iha sede suco sira no questiona kona-ba salário ba professor sira iha áreas remotas ne'ebé diferente ho professor sira iha vila.

Sr.^a Secretária de Estado dos Assuntos Parlamentares (Maria Teresinha Viegas) hatán ba preocupação hussi Sr. Deputado sira mak hanessian Manuel Gaspar Soares da Silva (FRETILIN), Brígida Antónia Correia (CNRT), Leonel Lisboa Marçal (FRETILIN), Benvinda Catarina Rodrigues (FRENTI-MUDANÇA), Manuel de Castro Pereira, Anastácia da Costa Amaral, Paulo Moniz Maia no Angélica da Costa (FRETILIN), César Valente de Jesus «Piloto» (CNRT) no ikusliu Florentina Martins Smith (FRETILIN).

Sr. Presidente fó-hanoin ba Deputado sira atu preocupa mós ho sira-nia saúde, inclui funcionário tomak Parlamento Nacional nian.

Sr. César Valente de Jesus «Piloto» (CNRT), iha ponto de ordem, questiona kona-ba mesa hatuur urna Deputado sira-nian ne'ebé mate atu halo oinsá tuir cultura Timor nian.

Sr.^a Florentina da Martins Smith (FRETILIN), iha ponto de ordem, informa ba Deputado sira atu tuir reunião iha parte loraik nian.

Ordem Do Dia — Mesa, liuhossi Presidente Parlamento Nacional, baixa ba Comissão de Assuntos Constitucionais, Justiça, Administração Publica, Poder Local e Anticorrupção (Comissão A) Proposta de Lei n.º 20/III (3ª) – Lei do Recenseamento Eleitoral, Proposta de Lei n.º 27/III (3ª) – Lei de Combate ao Tráfico de Droga e Proposta de Lei n.º 30/III (3ª) – Procedimento de Concessão de Indulto ne'ebé Sr. Deputado Arão Noé de Jesus Amaral simu no mós ba Comissão de Negócios Estrangeiros, Defesa e Segurança Nacionais (Comissão B) Proposta de Resolução n.º 17/III (3ª) – Acordo entre a República Democrática de Timor-Leste e a Santa Sé ne'ebé Sr. Deputado Jacinto Viegas Vicente «Roque» simu.

Sr. Presidente taka sessão plenária iha tuku 11 liu minuto 56 dadeer.

JPN – I SÉRIE–A – N.º 2 (21-09-2015)

SUMÁRIO

Antes da Ordem do Dia — Sr. Presidente loka sessão plenária iha tuku 10 liu minuto 06 dadeer no halo leitura agenda de trabalho loran ne'e nian.

Iha intervenção diversa sira: Sr. Agostinho Lay (CNRT) informa katak comunidade iha Railaco la hetan bee moos. Nia hussu ba Ministério da Administração Estatal atu hadi'a edifício Posto Administrativo Remexio nian ne'ebé aat ona e ba Ministério competente atu chama atenção ba estudante sira ne'ebé la tama escola no la'o halimar de'it iha cidade Díli laran.

Sr. Manuel de Castro Pereira (FRETILIN) hussu ba CAC (Comissão Anti-Corrupção) atu investiga companhia ne'ebé kaer projeto ki'ik iha Oecússi ne'ebé la iha liu qualidade, nune'e mós ba Ministério ne'ebé fó projeto ba companhia ne'e, atu investiga ex-Ministro Pedro Lay tanba la fó atenção ba ró Nakroma, ba Comissão Função Pública atu investiga funcionária ida iha gabinete ex-Ministro Pedro Lay nian ne'ebé to'o agora sei simu nafatin ossan maski nia la tama ona serviço.

Sr. Domingos de Carvalho Araújo (CNRT) informa katak comunidade iha aldeia Aicurus, Posto Administrativo Remexio nian, to'o horas ne'e seidak hetan acesso ba eletricidade no condição estrada iha-ne'ebá aat tebetebes.

Sr. Francisco de Andrade (FRETILIN) hussu atu Ministro explica iha Parlamento Nacional kona-ba atraso ba merenda escolar, atu Ministério competente haruka companhia construtora ba estrada atu rega beibeik rai-rahun iha Mota-Massin ligado ba capital Suai- Covalima, e ikusliu atu Governo tau matan ba comunidade Belulic, Fatumean nian, ne'ebé sussar tebes ba bee moos.

Sr. Jorge da Conceição Teme (FRENTI-MUDANÇA) hussu ba Governo atu tau matan ba matadouro iha Manatuto ne'ebé to'o agora la usa, ba Ministério da Administração Estatal no Organização Não-Governamental CEPAD (*Centre of Studies for Peace and Development*) atu decide entre sira sé mak atu sai proprietário ba rai iha suco Ma'abat. Nia lamenta tebes ba ema balu ne'ebé kaer ikan beibeik iha fatin ne'ebé tara-bandu, e hussu ba Governo atu tau matan ba qualidade alcatrão iha Díli laran no ikusliu hussu atu controla antena telecomunicação sira ne'ebé harii loos iha comunidade sira-nia leet tanba bele fó moras ba sira.

Sr. Eládio António Faculto de Jesus (FRETILIN) apela ba Governo atu acelera desenvolvimento no hassai povo hussi hukit, hussu ba Governo atu hatudu ba mundo internacional kona-ba execução orçamento iha Fundo de Transferência. Deputado ne'e hussu mós ba Ministério competente atu chama atenção ba comunidade sira ne'ebé sunu rai arbiru, e ikusliu nia considera veterano sira ne'ebé hadau malu projeto ne'e mak impede desenvolvimento nacional.

Sr. Adriano João (PD) hussu ba Governo tau matan ba comissário Comissão Homenagem nian sira ne'ebé fulan barak ona seidak simu sira-nia salário no mós transporte. Nia hussu mós ba Ministro das Obras Públicas, Transportes e Comunicações no Vice-Ministro ne'ebé tutela ba eletricidade atu dada ahi eletricidade hussi Ponte Loes nian to'o suco Atabae no mós iha fatin balu hanessian Suco Guda no Suco Lupal ne'ebé povo sei halerik ba eletricidade. Tuirmai, nia hussu ba Governo atu hadi'a estrada hussi Ponte Loes ba Cailaco.

Sr.^a Angélica da Costa (FRETILIN) hussu ba VI Governo Constitucional atu tau matan ba povo nia halerik mak hanessian hahalok sunu rai no caça animal ne'ebé mossu beibeik. Nia lamenta ba Governo nia insucesso hodi sossa

povo nia ai-han, tanba ikusmai animal fuik mak han fali ai-han sira-ne'e. Nia mós hato'o katak povo Taitudac fulan tolu ona mak la hetan ahi eletricidade, e escola filial iha Aldeia Manus ne'ebé nia condição aat tebes no mós falta carteira.

Sr. Francisco da Costa (CNRT), liga ba preocupação ema intelectual balu hussi sociedade civil ne'ebé questiona kona-ba lei ne'ebé tama iha Parlamento Nacional hodi hussu katak ema-sira-ne'e precisa buka hatene assunto ne'e iha Uma-fukun tanba lei lubuk ida mak baixa ba Comissão sira. Tuirmai, nia lamenta ho fornecimento bee moos nia iha território laran tomak tanba iha ema balu ne'ebé usa *Sanyo* hodi dada bee ba sira-nia interesse rassik.

Sr.^a Joaquina de Jesus (FRETILIN) preocupa ba companhia ida-ne'ebé abandona projeto barragem iha Posto Administrativo Maucatar, Suco Holpilat, Aldeia Fatuc Oan no mercado iha Covalima ne'ebé falta facilidade.

Sr.^a Olinda Morais (PD) sugere atu continua fiscaliza tuir ba ajuda ne'ebé uluk SEPI (Secretaria de Estado da Promoção da Igualdade) fó ba grupo sira iha município 13. E nia lamenta mós ba condição escola primária Centro Ensino Básico 11 de Março Maucatar ne'ebé aat.

Sr. Leonel Lisboa Marçal (FRETILIN) sugere ba Governo atu distribui uluk cadeira ho mesa ba escola sira iha área rural do que iha vila, distribuição cadeira ba escola iha Tilomar ne'e barak mak la iha qualidade. Nia mós hato'o katak Aldeia Belulic, Suco Nanu, Município Covalima seidak acesso ba eletricidade.

Ordem do Dia — Apresentação Relatório Anual 2014 Provedoria de Direitos Humanos e Justiça nian ba Uma-Fukun Parlamento Nacional hussi Provedor de Direitos Humanos e Justiça, Sr. Silvério Pinto Baptista. Tuirmai Provedor ne'e mós hatán ba pergunta no preocupação sira ne'ebé Deputado sira hato'o mak hanessan: Sr.^a Virgínia Ana Belo (CNRT), Sr. Eládio António Faculto de Jesus (FRETILIN), Sr. Francisco da Costa (CNRT), Sr. Osório Florindo da Conceição Costa (FRETILIN), Sr. Paulino Monteiro Soares Babo (PD), Sr. Jorge da Conceição Teme (FRENTI-MUDANÇA), Sr. Joaquim dos Santos (FRETILIN), Sr.^a Izilda da Luz Pereira Soares (CNRT), Sr.^a Jacinta Abucau Pereira (PD), Sr.^a Albina Marçal Freitas (CNRT).

Sr. Presidente taka sessão plenária iha tuku 1 liu minuto 36 loraik.

JPN – I SÉRIE–A – N.º 3 (22-09-2015)

SUMÁRIO

Período de Antes da Ordem do Dia — Sr. Presidente (Vicente da Silva Guterres) loke sessão plenária iha tuku 9 liu minuto 52 dadeer no lê agenda trabalho ba loron ne'e nian.

Sr.^a Izilda da Luz Pereira Soares (CNRT), nu'udar Vice-Presidente Comissão C, no Sr. Deputado Antoninho Bianco (FRETILIN), nu'udar Relator, apresenta Relatório e Parecer Comissão C nian kona-ba visita de trabalho iha Singapura. Tuirmai, Deputado sira: Sr. Paulino Monteiro Soares Babo (PD), Sr.^a Josefa Álvares Pereira Soares (FRETILIN) no Sr. Duarte Nunes (CNRT) halo apreciação ba Relatório Visita ne'e no hato'o mós preocupação balu. Ikusmai Sr. Presidente no Sr. Antoninho Bianco, nu'udar Relator, hatán mós ba preocupação hirak-ne'e.

Iha intervenção diversa sira: Sr.^a Benvinda Catarina Rodrigues (FRENTI-MUDANÇA) hussu ba Bancada haat iha Parlamento Nacional atu discute lailais Lei Pensão Mensal Vitalícia iha tempo badak, ba Ministério do Turismo atu organiza didi'ak fatin turismo Cristo-Rei, nune'e bele hetan retorno económico ba Estado. Ikusliu, nia hussu ba Governo atu tau matan ba timoroan ida ne'ebé detém iha Singapura.

Sr. Manuel Gaspar Soares da Silva (FRETILIN) lamenta tebes ba funcionário Ministério Público nian ida ne'ebé usa carreta Estado hodi bá hala'o nia atividade pessoal. Deputado ne'e mós hussu kona-ba Ministério do Comércio, Indústria e Ambiente nia posição ba hare tonelada 300 ne'ebé aat iha armazém Beborá.

Sr.^a Albina Marçal Freitas (CNRT) hussu ba VI Governo Constitucional atu apresenta iha Parlamento Nacional sira-nia serviço ne'ebé halo durante loron 100 governação nian no mós explica koba-ba lala'ok Desluto Nacional ne'ebé hala'o tiha ona. Deputada ne'e hussu mós ba Ministra da Solidariedade Social no Primeiro-Ministro atu explica kona-ba cartão ne'ebé la dignifica veterano sira. Iha sorin seluk, nia convida Governo atu hatán kona-ba tanbassá mak iha gasto barak tebetebes hussi orçamento ne'ebé iha. Ikusliu, nia hato'o mós katak empresário sira hussu ba Governo atu sira-nia certidão dívidas nia prazo ne'e hanaruk ba fulan neen-neen.

Sr.^a Florentina Martins Smith (FRETILIN) critica execução orçamento Governo nian ne'ebé seidak liu 70% tuir cálculo ne'ebé iha. Nia hatutan tan katak execução orçamento ne'e, ida-ne'ebé boot liu mak iha categoria «Bens e Serviços», nune'e nia hussu atu Primeiro-Ministro no membro Governo sira atu hatán iha Uma-Fukun Parlamento Nacional kona-ba ida-ne'e. Além de ne'e, Deputada ne'e mós hatutan empresário sira-nia preocupação katak tem que hadi'a sira-nia cartão de dívidas hodi hanaruk tan nia prazo ba fulan neen nia laran, nune'e la bele dificulta sira.

Sr.^a Domingas Alves da Silva (CNRT) hussu ba Governo atu fó resposta kona-ba atribuição cartão ba veterano sira. Nia secunda Deputado Manuel Gaspar nia intervenção kona-ba funcionário Ministério Público nian ne'ebé usa fali carreta Estado nian ba assunto pessoal. Tuirmai nia sugere atu votação ba comissão na'in-rua ba Comissão Homenagem ne'e tuir pacote de'it. Nia questiona kona-ba aprovação no execução orçamento ne'ebé aloca ba Posto Administrativo Lacluta para harii uma ba mate-ruin nian, tanba to'o agora ida-ne'e seidak realiza. Hodi taka, Deputada ne'e mós hussu ba Ministério da Solidariedade Social atu resolve problema comissão Comissão Homenagem nian na'in-neen ne'ebé la simu salário no la simu mós carreta Estado.

Sr.^a Anastácia da Costa (FRETILIN) hussu ba Governo atu hadi'a no tau matan ba estrada iha Hudi-Laran. Nia lamenta tebetebes tanba to'o agora Suco Luca falta atenção tanba povo la hetan acesso ba eletricidade. Deputada ne'e hussu nafatin atu Governo tau matan ba mota iha suco Caicassa ne'ebé tau de'it *bronjong* ida, nune'e bele fó risco bainhira udan boot. Nia hato'o tan katak precisa hadi'a irrigação iha Bahalarauain ne'ebé fornece bee natar comunidade sira-nian. Nia dehan tan katak precisa tau atenção ba pessoal ne'ebé estraga fali ai-teka iha suco balu iha Posto Administrativo Viqueque nian. Ikusliu, Deputada ne'e hussu ba instituição competente atu fó chamada de atenção ba inspetora ida hussi Polícia Nacional de Timor-Leste ne'ebé insulta fali nia liuhossi mensagem telemóvel.

Sr. Adriano do Nascimento (PD) hussu ba Presidente Parlamento Nacional hodi fó instrução ba Comissão E para halo fiscalização ba projeto construção Aeroporto Suai. Deputado ne'e hatete katak Bancada PD hatama ona proposta de lei hodi halo alteração Lei Pensão Mensal Vitalícia no nia hussu atu bancada sira seluk mós bele hatama sira-nian hodi discute lailais. Kona-ba Desluto Nacional, nia explica katak Nação halo ida-ne'e atu taka ona página negra passado nian hodi hakat ba desenvolvimento, mas processo recolha restos mortais ne'e sei la'o nafatin.

Sr. Paulino Monteiro Soares Babo (PD) clarifica katak Comissão E sussar atu fiscaliza projeto Aeroporto Suai tanba Presidente Comissão sei moras hela no Vice-Presidente Comissão fila ona ba Na'i Maromak nia kadunan santo. Maibé, nia promete katak sei bá fiscaliza duni iha semana rua tuirmai.

Sr. Presidente hussu atu Comissão E bele elege lailais Vice-Presidente foun Comissão E nian hodi substitui matebian, Sr. Deputado Fó-Laran.

Sr. Natalino dos Santos Nascimento (CNRT) clarifica katak Bancada CNRT haruka ona carta ba Mesa kona-ba membro comissão seluk balu ne'ebé substitui fali membro balu no reforça tan serviço iha Comissão E. Deputado ne'e mós hato'o katak Bancada CNRT delega Deputado balu ba Comissão E tanba Comissão ne'e nia knaar importante tebetebes.

Sr. Osório Florindo da Conceição Costa (FRETILIN) hussu Parlamento Nacional atu estuda didi'ak molok halo substituição ba Deputado sira tanba bele implica ba transferência salarial.

Sr. Presidente hussu desculpa tanba tempo la to'o ona atu Deputado inscrito sira seluk halo intervenção.

Tuirmai Sr.^a Secretária de Estado dos Assuntos Parlamentares (Maria Teresinha Viegas) hatán ba preocupação hussu Deputado sira mak hanessan: Sr.^a Florentina Martins Smith (FRETILIN), Sr.^a Albina Marçal Freitas no Sr.^a Maria Domingas Alves da Silva «Bilou-Mali» (CNRT)

Presidente Comissão A, Sr.^a Carmelita Caetano Moniz (CNRT) halo explicação relaciona ho presença Ministro da Justiça nian iha discussão ba Projeto de Lei ne'e, nune'e iha mós ponto de ordem hussu Deputado sira mak hanessan Sr.^a Domingas Alves da Silva «Bilou-Mali» (CNRT), Sr. Joaquim dos Santos (FRETILIN) no Sr. Antoninho Bianco (FRETILIN) no Sr. Arão Noé de Jesus Amaral (CNRT), hodi hato'o katak la necessário atu Ministro ne'ebé tutela marca presença no hussu atu continua sessão plenária ne'e iha loraik.

Sr. Presidente Parlamento Nacional, relaciona ho intervenção Deputado balu nian kona-ba exigência hussu sociedade civil hodi halo alteração ba Lei Pensão Mensal, nia hato'o katak assunto ida-ne'e importante, maibé Parlamento Nacional nu'udar órgão de soberania tem que rona hussu parte hotu nune'e bele decide tuir interesse Estado no Nação nian. Tuirmai hussu continua sessão iha parte loraik no nia taka sessão plenária dadeer nian iha tuku 12 liu minuto 48.

Período da Ordem do Dia — Sessão continuação ne'e hahú iha tuku 3 liu minuto 37 lokraik no Parlamento Nacional halo discussão no votação na generalidade ba Projeto de Lei n.º 7/III (3ª) — Terceira Alteração à Lei n.º 11/2008, de 30 de Julho (Regime Jurídico da Advocacia Privada e da Formação dos Advogados) no decide hodi entrega ba Comissão A mak halo discussão na especialidade.

Sr. Presidente (Adriano do Nascimento) taka sessão plenária iha tuku 5 liu minuto 47 dadeer.

JPN – I SÉRIE–A – N.º 4 (28-09-2015)

SUMÁRIO

Sr. Presidente loke sessão plenária iha tuku 10 liu minuto 5 no lê guião discussão ba loron ne'e nian.

Período da Ordem do Dia — Parlamento Nacional hala'o debate ho Ministério das Obras Públicas, Transportes e Comunicações, tuir artigo 152.º, Regimento do Parlamento Nacional nian. Sr. Ministro das Obras Públicas, Transportes e Comunicações (Gastão de Sousa) no Sr. Vice-Ministro das Obras Públicas, Transportes e Comunicações II (Inácio Moreira) hatán diretamente ba cada pergunta ne'ebé Sr.a Deputada no Sr. Deputado sira hato'o. E Sr.^a Secretária de Estado dos Assuntos Parlamentares (Maria Teresinha Viegas) mós hato'o nia observação kona-ba tempo intervenção nian ne'ebé atribui ba distinto Deputado sira no membro Governo sira.

Sr. Deputado sira ne'ebé halo intervenção mak hanessan tuirmai ne'e: Sr.^a Maria Fernanda Lay (CNRT), Sr. Manuel de Castro Pereira (FRETILIN), Sr. Virgílio da Costa Hornai (PD), Sr. Adérito Hugo da Costa (CNRT), Sr.^a Maria Angélica Rangel, Sr. Joaquim dos Santos, Sr. Aniceto Longuinhas Guterres Lopes (FRETILIN), Sr. Adriano do Nascimento (PD), Sr. Natalino dos Santos Nascimento, Sr.^a Domingas Alves da Silva «Bilou-Mali» (CNRT), Sr. Jorge da Conceição Teme (FRENTI-MUDANÇA), Sr. Eládio António Faculto de Jesus (FRETILIN), Sr. Francisco da Costa (CNRT), Sr.^a Angelina Machado de Jesus (PD), Sr.a Albina Marçal Freitas (CNRT), Sr.^a Josefa Álvares Pereira Soares, Sr. Antoninho Bianco (FRETILIN), Sr. Agostinho Lay, Sr. César Valente de Jesus «Piloto» no Sr.a Bendita Moniz Magno (CNRT).

Sr. Presidente taka sessão plenária iha tuku 5 liu minuto 44 lokraik.

JPN – I SÉRIE–A – N.º 5 (29-09-2015)

SUMÁRIO

Sr. Presidente loke sessão plenária iha tuku 10 liu minuto 11 no lê agenda de trabalho ba loron ne'e nian. Além de ne'e, nia convida Srs. Presidentes Bancadas Parlamentares atu marca presença iha encontro ne'ebé sei hala'o iha nia gabinete.

Iha intervenção diversa sira: Sr. Aniceto Longuinhos Guterres Lopes (FRETILIN) halo ponto de ordem hodi questiona kona-ba conteúdo agenda nian ne'ebé la iha Período da Ordem do Dia, tanba iha Conferência de Líderes das Bancadas Parlamentares agendado ona eleição ba comissário Comissão de Homenagem no aprovação final global ba alteração Lei de Órgãos da Administração Eleitoral. Deputado ne'e questiona mós processo pagamento ne'ebé centra de'it ba veterano sira no ignora tiha cliente normal sira iha BNCTL (Banco Nacional de Comércio de Timor-Leste) Maliana. Nia lamenta ba condição escola Odomau nian ne'ebé iha de'it sala tolu ba turma 12 no iha escola secundária ne'ebá, ne'ebé aluno barak tebetebes, to'o aluno balu la conhece sira-nia mestre sira. Nia concorda atu halo alteração ba Lei kona-ba Pensão Mensal Vitalícia, maibé hussu atu Parlamento labele serviço iha pressão nia laran.

Sr. Presidente hatán ba Deputado Aniceto Guterres nia preocupação katak la iha possibilidade atu iha loron ne'e halo eleição ba comissário Comissão de Homenagem tanba Bancada Parlamentar balu foin hatama sira-nia candidatura. Iha tempo hanessian, labele halo mós discussão e votação final global ba Lei de Órgãos da Administração Eleitoral tanba ausência hussi Presidente no Vice-Presidente Comissão A.

Sr. Francisco Miranda Branco (FRETILIN) lamenta tebetebes ba atendimento iha Hospital Nacional Guido Valadares (HNGV), liuliu iha sala de emergência, tanba aparelho koko tensão nian la iha. Relaciona ho universidade balu iha Indonésia ne'ebé fó sai diploma falso ba curso licenciatura, mestrado no doutoramento, Deputado ne'e hussu ba Ministério competente atu haree questão ne'e hodi la tau dúvida ba qualidade recurso humano timoroan nian.

Sr.^a Jacinta Abucáu Pereira (PD) hussu ba Presidente Instituto do Petróleo e Geologia nian atu revê filafali carta notificação ne'ebé hassai hodi hapara contrato ba funcionário balu ne'ebé serviço iha instituição ne'e. Nia hussu ba Presidente Parlamento Nacional atu autoriza assessor jurídico na'in-ida hodi fó apoio ba Comissão D durante discussão especialidade Comissão nian ba Lei Proteção Consumidor nian.

Sr. Eládio António Faculto de Jesus (FRETILIN) triste tebes tanba HNGV la bele salva kossok-oan ida nia vida tanba falta energia eletricidade nian no questiona mós ba atendimento em geral ne'ebé la'o la di'ak. Nia hussu atu halo avaliação ba qualidade recurso humano tomak, keta halo médico timoroan balu mós hassai diploma falso hodi resulta ba atendimento saúde ne'ebé la'o la di'ak. Ikusliu, Deputado ne'e lamenta tebetebes ba crítica hussi manifestante sira ne'ebé hatete aat Deputado sira relaciona ba pensão vitalícia ne'e Deputado sira hetan direito bá.

Sr.^a Maria Fernanda Lay (CNRT) hussu ba Ministério competente no mós Comissão da Função Pública atu forma equipa ida hodi investiga Instituto do Petróleo e Geologia ne'ebé demite nia funcionário contratado sira, bassá desconfia katak mossu irregularidade iha-ne'ebá.

Sr.^a Anastácia da Costa Amaral (FRETILIN) sugere atu Comissão da Função Pública mak loke concurso funcionário sira iha Instituto do Petróleo e Geologia. Nia mós lamenta tebes ba lixo ne'e soe arbiru iha Díli laran, liuliu lixo ne'ebé bou hela de'it iha Hudi-Laran, Bairro Pité nian.

Sr. Eduardo de Deus Barreto «Dusae» (CNRT) preocupa tebes ba vítima lubuk ida ne'ebé ema oho sira-nia família no sunu sira-nia uma tanba desconfia katak buan, e to'o agora sira sei hela nafatin iha lona okos. Deputado ne'e mós hussu ba Parlamento Nacional atu arranja fatin descansa nian ba funcionário empresa limpeza nian sira.

Sr. Jorge da Conceição Teme (FRENTI-MUDANÇA) hussu ba Governo atu halo uluk estudo viabilidade mak foin bele construi matadouro iha município sira. Nia mós hussu ba Ministra da Saúde atu fó orientação e chama atenção ba médico timoroan sira, tanba balu serviço la tuir código de ética hodi fó sai fali segredo paciente nian. Deputado ne'e mós hussu ba Ministério da Educação atu chama atenção ba professor iha Ermera, liuliu iha Suco Estado, tanba usa farda partido no artes marciais nian hodi hanorin aluno sira. Nia hussu ba Ministério da Saúde atu fó explicação kona-ba alocação orçamento ba clínica matan nian. Nia hatutan comunidade ne'ebé harii cooperativa iha Ermera nia pedido hodi hussu atu Governo incentiva nafatin cooperativa hirak-ne'e.

Sr.^a Anastácia da Costa (FRETILIN) clarifica kona-ba caso funcionário Instituto do Petróleo e Geologia nian ne'e katak tem que fó consideração ba funcionário na'in-14 ne'e liuhossi concurso público.

Sr. Paulo Moniz Maia (FRETILIN) considera katak mossu discriminação iha Ministério da Educação durante halo recrutamento ba professor sira, tanba iha professora voluntária ida ne'ebé nunca hetan contrato maski hanorin kleur ona. Nia mós questiona kona-ba ossan ba concessões escolares ne'ebé professor sira iha Lolotoe nunca iha conhecimento ba nia implementação. Ikusliu, nia lamenta, tanba preocupação sira ne'ebé Deputado sira hato'o ba Governo iha loron plenária nian, maibé la iha resposta.

Sr.a Domingas Alves da Silva «Bilou Mali» (CNRT) hussu atu Comissão da Função Pública hadi'a nia sistema administração pública. Tuirmai, Deputada ne'e questiona processo candidatura ba comissário Comissão de Homenagem relaciona ho comissário ida ne'ebé resigna an depois de eleito. Nia hato'o mós katak partido sira iha compromisso hodi altera Lei kona-ba Pensão Mensal Vitalícia, maibé la'ós lailais tanba iha mós proposta de lei balu ne'ebé precisa aprovação ho urgência. Ikusliu nia bolu atenção atu hamoos fo'er iha Díli laran tanba bele afeta ba saúde pública.

Sr.a Ana da Conceição Ribeiro (FRETILIN) questiona eletricidade riin ne'ebé aat ona maibé seidak hadi'a. Nia hussu atu ministério competente tau tinta ne'ebé ho qualidade di'ak ba passadeira sira atu labele aat lailais. Deputada ne'e lamenta ba bee moos iha Farol ne'ebé tinan ida ona la iha. Nia hato'o katak maioria cidadão mak sofre moras tensão aas, maibé ai-moruk ba moras ne'e menos liu. Deputada ne'e mós hussu ba Ministério competente sira atu controla sassán sira ne'ebé liu ona prazo atu labele afeta ba consumidor sira. Ikusliu, hussu nafatin atu companhia balu ne'ebé suru rai-henek iha ponte okos Vemasse nian atu hapara atividade ne'e.

Sr.a Bendita Moniz Magno (CNRT) questiona equipamento hospitalar ne'ebé falta no construção ba Hospital de Referência de Baucau ne'ebé to'o agora seidak remata. Nia sugere ba Governo, liuliu Secretaria de Estado para o Apoio e Promoção Sócio-Económica da Mulher, atu verifica Fundo de Transferências Secretaria de Estado da Promoção da Igualdade nian ba grupo sira iha município sira. Tuirmai, nia mós lamenta tebetebes ba informação ne'ebé fó sai iha jornal balu katak Deputado sira la halo alteração ba Lei kona-ba Pensão Mensal Vitalícia tanba kiak.

Sr. Osório Florindo da Conceição Costa (FRETILIN) hatete katak razoável atu halo discussão ba Lei kona-ba Pensão Mensal Vitalícia relaciona ho exigência manifestante sira-nian kona-ba alteração ba Lei ne'e. Deputado ne'e mós questiona processo recrutamento iha instituição Estado nian sira no hussu atu processo recrutamento ne'e tem que tuir lei função pública nian.

Sr.a Izilda da Luz Pereira Soares (CNRT) halo ponto de ordem hodi hussu atu Mesa controla tempo Plenária nian atu nune'e sira bele continua hala'o serviço Comissão nian.

Sr. Antoninho Bianco (FRETILIN), iha ponto de ordem, hussu atu mantém tempo ba Deputado sira ne'ebé regista ona hodi halo intervenção hodi hato'o questão balu ne'ebé pertinente atubele discute. Deputado ne'e mós sugere atu uniformiza regra ba recrutamento funcionário público sira tomak. Nia hussu atu completa equipamento hospital nian no

investe ba timoroan hodi hamossu tan médico especialista. Deputado ne'e mós sugere atu investe maka'as ba assunto saúde no educação nian, liuliu cria condições atubele fó atendimento ne'ebé di'ak ba ema hotu.

Sr.a Angélica da Costa (FRETILIN) questiona distribuição foos ba merenda escolar iha Suco Rotuto ne'ebé la iha qualidade. Nia sugere mós atu harii residência ba polícia U.P.F (Unidade de Patrulhamento de Fronteira) sira iha suco ne'ebé hanessian hodi hala'o serviço di'ak liután. Deputada ne'e hato'o katak precisa halo controlo ba serviço alfabetização nian. Ikusliu, nia secunda Deputado Francisco Branco nia intervenção kona-ba assunto educação no saúde nian no secunda mós Deputado Jorge Teme kona-ba inspeção ba professor sira iha áreas remotas.

Sr. Adérito Hugo da Costa (CNRT) questiona funcionamento função pública nian iha ministério sira. Nia mós hussu atu Parlamento Nacional, além de bolu Ministro no Secretário de Estado sira, bolu mós sira ne'ebé ocupa cargo de chefia hodi hatán ba Parlamento kona-ba funcionamento instituição ida-idak.

Sr. António Ximenes (CNRT) hussu ba Ministério da Saúde atu hadi'a qualidade atendimento iha HNGV. Nia hussu mós Ministério Saúde tau funcionário limpeza nian atu cuida higiene iha sala paciente nian sira iha hospital refere.

Sr.^a Benvinda Catarina Rodrigues (FRENTI-MUDANÇA) questiona kona-ba grupo ilegal ne'ebé halo cobrança ba veterano sira ne'ebé simu sira-nia ossan iha BNCTL Ermera nian no sugere atu haruka polícia bá atua. Nia hussu atu Polícia de Trânsito ne'e tem que atua lailais bainhira mossu acidente ruma. Deputada ne'e hussu katak iha possibilidade atu VI Governo Constitucional, iha Orçamento Geral do Estado 2016, tau ossan ba construção Aeroporto Baucau nian ka lae, tanba kleur ona mak Aeroporto ne'e abandonado.

Sr.^a Florentina Martins Smith (FRETILIN) concorda atu Parlamento Nacional bolu Ministério da Saúde, Ministério da Educação no Comissão da Função Pública atu hatán iha Plenário no sugere atu convida Sr.^a Ministra das Finanças hodi explica kona-ba execução orçamental Governo nian no investimento fundo mina-rai nian. Deputada ne'e hussu mós ba Secretário de Estado das Terras e Propriedades atu tau matan ba rai mamuk sira ne'ebé pertence ba Estado atu ema labele ocupa arbiru. E ikusliu, nia hussu ba Governo, liuliu Ministério das Finanças atu emite certidão de dívidas ba empresário sira-ne'e ho nia prazo ba fulan neen, nune'e labele dificulta sira hodi manán projeto.

Sr. Francisco da Costa (CNRT) hussu ba manifestante universitário sira atu labele fó pressão ba Parlamento Nacional tanba sei iha biban ba Deputado sira hodi discute Lei kona-ba Pensão Mensal Vitalícia. Nia mós critica relatório PDHJ nian ne'ebé relata katak Parlamento la iha kbiit no nia decisão inconstitucional.

Sr.^a Albina Marçal Freitas (CNRT) questiona kona mecanismo distribuição fita luto ne'ebé hussik hela de'it iha caixa laran no ikusmai família mártir sira rassik mak foti hodi fahe fali. Nia hussu ba Governo atu hadi'a semáforo iha supermercado Leader nia oin hodi evita acidente trânsito. Representante povo ne'e mós lamenta tebes ba Dr. Ramos Horta nia declaração ne'ebé dehan katak Deputado sira sei kiak, nune'e mak hakarak simu pensão vitalícia. Tuirmai, nia hussu ba juventude manifestante sira atu labele halo pressão tanba Parlamento Nacional mós iha iniciativa atu altera Lei Pensão Mensal Vitalícia nian ne'e. Ikusliu, nia secunda Deputada «Bilou-Mali» nia intervenção ne'ebé hussu atu convida Presidente Comissão de Homenagem no Ministra da Solidariedade Social hodi clarifica kona-ba assunto ne'ebé relaciona ho problema veterano nian ba Parlamento Nacional.

Sr. Virgílio da Costa Hornai (PD) hussu ba Governo atu soluciona problema ne'ebé funcionário sira iha Instituto do Petróleo e Geologia hassoru.

Tuirmai, Sr.^a Secretária de Estado dos Assuntos Parlamentares (Maria Teresinha Viegas) hatán ba Deputado António Ximenes (CNRT), Antoninho Bianco (FRETILIN), Benvinda Catarina Rodrigues (FRENTI-MUDANÇA) no Florentina Martins Smith (FRETILIN) nia preocupação ne'ebé hato'o ba Governo.

Iha biban ne'e Sr.^a Maria Fernanda Lay (CNRT), nu'udar Secretária da Mesa, hussu ba Deputado sira atu entrega ona correção ruma, se iha karik, ba texto Jornal do Parlamento Nacional nian ne'ebé fahe tiha ona ba cada Deputado atu halo leitura verificação, nune'e Divisão de Redação, Audiovisual, Transcrição e Documentação (DIRAT) bele halo publicação. Ba questão ida-ne'e Sr. Presidente avisa no fó tan tempo ba Deputado sira atu lê hotu kedas texto transcrito ne'e no congratula mós ba serviço ne'ebé redator no revisor sira-nia hala'o. E Deputado balu questiona tanba foin simu documento transcrito ne'e no seluk sugere atu haruka documento ne'e liuhossi correio eletrônico Parlamento nian no realiza uluk leitura iha Plenário mak foin halo aprovação.

Além de ne'e mós mossu diferença ideia entre Deputado sira hussi Bancada Parlamentar haat ne'e kona-ba determinação horário hodi simu estudante manifestante sira iha Parlamento Nacional hodi ko'alia kona-ba exigência ba alteração Lei Pensão Mensal Vitalícia nian ne'ebé sira hato'o no posição Parlamento nian kona-ba assunto refere.

Sr. Presidente taka sessão plenária ne'e iha tuku 1 liu minuto 2 loraik.

JPN – I SÉRIE–A – N.º 6 (05-10-2015)

SUMÁRIO

Sr. Presidente loke Sessão Plenária iha tuku 10 liu minuto 23 dadeer no lê agenda trabalho loran ne'e nian.

Tuirmai, Parlamento Nacional halo execução ba hino nacional *Pátria*.

Antes Ordem do Dia — Iha intervenção diversa sira: Sr. Eduardo de Deus Barreto «Dusae» (CNRT) questiona kona-ba cobrança ilegal ba veterano sira iha Município Ermera. Nia mós hussu atu Mesa considera proposta substituição temporária Deputado nian balu ne'ebé nia Bancada hatama ona.

Sr. António dos Santos «55» (FRETILIN) secunda intervenção Sr. Deputado Eduardo de Deus Barreto nian kona-ba cobrança ilegal ba veterano sira no hussu atu Governo resolve problema ne'e. Nia questiona mós kona-ba negociante balu ne'ebé continua fa'an cigarro ne'ebé liu ona prazo iha Ermera.

Sr.^a Maria Fernanda Lay (CNRT) questiona kona-ba diferença loran férias anuais nian entre funcionário público no funcionário setor privado. Deputada ne'e lamenta tanba ema balu ne'ebé fuma iha aeroporto laran, maski iha ona regulamento Governo nian hodi bandu ema atu labele fuma iha fatin público sira.

Sr. David Dias Ximenes (FRETILIN) lamenta tebetebes tanba comunidade Lacló la acesso ba estrada ne'ebé d'ak no falta bee moos, e eletricidade ne'ebé la tama iha suco Açumano no Fahilebo, Município Liquiçá nian.

Sr. Jorge da Conceição Teme (FRENTI-MUDANÇA) questiona kona-ba fatin fa'an ikan no ró ne'ebé Governo oferece ba comunidade sira iha Maubara abandonado hela; comunidade Loes nia produção batar ne'ebé tun tanba falta tratores. Nia hussu mós atu Governo tulun comunidade sira iha-ne'ebá hodi halo rejuvenescimento ba café tuan sira. Ikusliu, nia hato'o nia satisfação tanba Governo sossa ona avião ba Oe-Cusse no nia hein katak ho avião ne'e, bele iha ona turista local barak mak hakarak visita região enclave ne'ebá.

Sr. Felisberto Monteiro Guterres (FRETILIN) critica Presidente do Parlamento Nacional ne'ebé cancela reunião Comissão D nian iha Maubara tan de'it assessora ne'ebé la marca presença.

Sr. Aurélio Freitas Ribeiro (FRETILIN) mós reforça Deputado Felisberto Guterres nia intervenção no lamenta tebes tanba Assessora ne'e informada ona kona-ba Comissão D nia discussão ne'ebé atu realiza iha Maubara, maibé nia la marca presença.

Sr. Presidente avisa ba Deputado sira katak questão cancelamento ba reunião Comissão D nian iha Maubara ne'e sei discute a nível comissões no nia hussu desculpa ba Deputado sira relaciona ho problema refere. Além de ne'e, nia mós explica katak la fácil atu halo lei ida iha loron ida nia laran.

Sr. Paulino Monteiro Soares Babo (PD) hussu atu muda sistema verificação ba veterano sira ne'ebé hamossu problema barak tanba balu simu pensão la condiz ho sira-nia tempo luta nian. Nia hato'o katak verificação bele halo liuhossi estrutura ne'ebé estabelece tiha ona iha tempo funu, e karik ne'e difícil uitoan ba Frente Clandestina nian.

Sr. Antoninho Bianco (FRETILIN) hussu kona-ba oinsá Governo nia mecanismo de trabalho no cooperação ho organização Não-Governamental sira iha rai-laran no mós rai-li'ur. Tanba cooperação no coordenação entre instituição sira ne'ebé metin bele hamenos sobreposição de atividades iha terreno.

Sr. Osório Florindo da Conceição Costa (FRETILIN) discorda ho intervenção Sr. Deputado Paulino Soares Babo nian ne'ebé hato'o katak difícil atu identifica ema iha Frente Clandestina, tan ne'e nia dehan funu ne'e estruturado no organizado hussi nível nacional to'o base.

Sr. Domingos de Carvalho Araújo (CNRT) hato'o nafatin nia insatisfeito relaciona cancelamento ba discussão Comissão D no Comissão C iha Maubara, maski Presidente Parlamento Nacional fó ona explicação no hussu desculpa.

Sr. Eduardo de Deus Barreto (CNRT) discorda ho Deputado balu nia intenção atu demite assessora Ana Mónica, tanba nia considera katak assessora ne'e experiente no halo lei barak ona hamutuk ho Deputado sira.

Ikusmai, Sr.^a Secretária de Estado dos Assuntos Parlamentares (Maria Teresinha Viegas) hatán ba Deputado sira tuirmai nia preocupação: Sr. Eduardo de Deus Barreto (CNRT), Sr. António dos Santos «55» (FRETILIN), Sr. Paulino Monteiro Soares Babo (PD), Sr.^a Domingas Alves da Silva, Sr.^a Albina Marçal Freitas no Sr.^a Maria Fernanda Lay (CNRT), Sr. David Dias Ximenes (FRETILIN), Sr. Jorge da Conceição Teme (FRENTI-MUDANÇA) no Sr. Antoninho Bianco (FRETILIN).

Ordem do Dia — Parlamento Nacional hala'o eleição hodi hili membro ema na'in-rua ba Comissão de Homenagem, Supervisão do Registo e Recursos.

Sr. Presidente taka sessão plenária iha tuku 6 liu minuto 26 loraik.

JPN – I SÉRIE – N.º 7 (07-10-2015)

SUMÁRIO

Sr. Presidente loka sessão plenária iha tuku 10 liu minuto 54 dadeer.

Molok hahú discussão, Sr. Deputado sira ko'alia uitoan kona-ba manifestação ne'ebé universitário sira halo hassoru Parlamento Nacional iha recinto Universidade Nacional Timor Lorosa'e nian.

Iha *Período da Ordem do Dia* — Parlamento Nacional hala'o discussão no aprovação ba Projeto de Resolução n.º 24/III(4.^a) – Aprova o Plano de Ação e o Orçamento do Parlamento Nacional para 2016 e procede à terceira alteração à Resolução do Parlamento Nacional n.º3/2009, de 25 de fevereiro.

Deputado sira ne'ebé halo intervenção maka Sr. David Dias Ximenes (FRETILIN), Sr. Eduardo de Deus Barreto «Dusae» (CNRT), Sr.^a Angélica da Costa no Sr.^a Ilda Maria da Conceição (FRETILIN), Sr. César Valente de Jesus «Piloto» (CNRT), Sr.^a Maria Angélica Rangel dos Reis, Sr.^a Josefa Álvares Pereira Soares no Sr.^a Anastácia da Costa Amaral (FRETILIN), Sr. Adriano João (PD), Sr.^a Albina Marçal Freitas (CNRT), Sr. Antoninho Bianco (FRETILIN), Sr.^a Domingas Alves da Silva «Bilou-Mali» (CNRT), Sr. Osório Florindo da Conceição Costa (FRETILIN), Sr. Paulino Monteiro Soares Babo (PD), Sr. Duarte Nunes (CNRT), Sr.^a Jacinta Abucáu Pereira (PD), Sr.^a Maria Rosa da Câmara «Bi Soi», Sr.^a Brígida Antónia Correia no Sr.^a Maria Fernanda Lay (CNRT), Sr.^a Olinda Morais (PD), Sr. Agostinho Lay (CNRT), Sr. Virgílio Maria Dias Marçal (CNRT), Sr. Felisberto Monteiro Guterres no Sr. Manuel Gaspar Soares da Silva (FRETILIN).

Sr. Presidente taka sessão plenária iha tuku 5 liu minuto 11 loraik.

SUMÁRIO

Sr. Presidente (Adérito Hugo da Costa) loke Sessão Plenária iha tuku 9 liu minuto 55 dadeer no hahú lê agenda trabalho nian.

Antes Ordem do Dia — Sr.ª Secretária da Mesa, Maria Fernanda Lay (CNRT) halo leitura ba carta justificação das faltas no carta substituição ba Deputado balu hussi Bancada CNRT.

Iha biban ne'e mós Comissão de Negócios Estrangeiros, Defesa e Segurança Nacionais (Comissão B), ne'ebé Sr. David Dias Ximenes (FRETILIN) nu'udar Presidente Comissão no Sr. Jacinto Viegas Vicente «Roque» (CNRT) nu'udar relator, halo apresentação relatório visita trabalho nian ba Austrália.

Iha intervenção diversa sira: Sr. Osório Florindo da Conceição Costa (FRETILIN) questiona declaração Diretor AJAR (*Asia Justice and Rights*) nian kona-ba fiscalização Parlamento nian ba projeto sira iha Oe-Cusse. Deputado ne'e questiona mós processo julgamento iha tribunal Suai, ne'ebé entre juiz ho arguido sei iha relação familiar.

Sr.ª Virgínia Ana Belo (CNRT) sugere ba Governo atu cuidado no haree didi'ak ema estrangeiro ne'ebé requiere atu sai cidadão Timor nian.

Sr. Paulino Monteiro Soares Babo (PD) sugere ba Ministério da Educação atu cria centro ida ba escola filial haat iha área Leolima no questiona projeto estrada Letefoho nian ne'ebé abandonado hela.

Sr.ª Josefa Álvares Pereira Soares (FRETILIN) secunda intervenção Sr. Deputado Osório Florindo nian, relaciona ho declaração Diretor AJAR nian. Tuirmai, nia mós questiona concurso ba fornecimento equipamentos ba Escola Técnica Vocacional Becora nian ne'ebé mossu irregularidade balu.

Sr.ª Jacinta Abucáu Pereira (PD) hussu ba Governo atu explica questão balu, relaciona ho paciente sira ne'ebé tem que selu bainhira consulta ba sira-nia moras balu iha Hospital Nacional Guido Valadares, nune'e mós ba mau atendimento iha fatin refere. Deputada ne'e sugere mós atu iha Orçamento 2016 ne'e, Secretária de Estado para o Apoio e Promoção Socio-Económica da Mulher, prioriza grupo beneficiário ki'ik sira iha Município de Manufahi ne'ebé hatudu empenho di'ak.

Sr. Agostinho Lay (CNRT) hussu ba Vice-Ministro das Obras Públicas, Transportes e Comunicações I atu resolve problema entre companhia hussi município seluk ho companhia no veterano sira iha Ermera kona-ba instalação eletricidade iha-ne'ebá. Nia informa mós katak fulan rua ona mak professor sira iha Gleno seidauk simu foos ba merenda escolar nian.

Sr.ª Maria Angélica Rangel dos Reis (FRETILIN) critica Diretor AJAR ne'ebé questiona burocracia iha implementação programa ZEESM nian iha Oe-Cusse.

Sr.ª Ângela Corvelo Sarmento (CNRT) questiona kona-ba aterro rai no fatuk iha tassi-ibun Farol nian ne'ebé bele fó impacto ba inundação tanba la iha drenagem.

Tuirmai, Sr.ª Secretária de Estado dos Assuntos Parlamentares (Maria Teresinha Veigas) hatán ba Sr.ª Jacinta Abucáu Pereira (PD), Sr. Agostinho Lay (CNRT) no Sr.ª Josefa Álvares Pereira Soares (FRETILIN) nia preocupação. Além de ne'e, explica mós kona-ba data submissão Proposta de Lei do Orçamento Geral do Estado para 2016 hussi Governo ba Parlamento Nacional no mós teto orçamento Parlamento Nacional nian tuir aprovação ne'ebé iha.

Ikusmai, iha mós ponto de ordem balu ne'ebé hato'o hussi Sr.ª Ilda Maria da Conceição (FRETILIN), Sr. Osório Florindo da Conceição Costa (FRETILIN) no Sr. Adriano João (PD).

Iha biban ne'e mós, Sr.ª Maria Fernanda Lay (CNRT) nu'udar Secretária da Mesa fó hanoin ba Deputado sira kona-ba leitura correção ba documento transcrição *Jornal do Parlamento Nacional*, atu nune'e bele publica.

Ordem do Dia — Parlamento Nacional hala'o eleição no aprovação ba candidato na'in-rua, Sr. José Augusto Fernandes Teixeira nu'udar membro efetivo no Arlindo Dias Sanches nu'udar suplente ba membro Conselho Superior do Ministério Público. Tuirmai, hala'o mós eleição no aprovação ba candidato na'in-rua seluk, Sr. Fernando Lopes de Carvalho nu'udar membro efetivo no Sr. Manuel Sarmento nu'udar suplente ba Conselho Superior da Defensoria Pública.

Sr. Presidente (Adérito Hugo da Costa) taka sessão plenária iha tuku 3 liu minuto 31 lokraik.
